



**IZVJEŠTAJ O RADU KOMISIJE ZA OČUVANJE
NACIONALNIH SPOMENIKA U 2015. GODINI**

Sarajevo, februar 2016. godine

SADRŽAJ

1.	NADLEŽNOSTI KOMISIJE ZA OČUVANJE NACIONALNIH SPOMENIKA.....	1
2.	PROVEDENE AKTIVNOSTI	1
2.1.	Donošenje odluka o proglašenju nacionalnim spomenicima	1
2.1.1.	Donošenje odluka o proglašenju nacionalnim spomenikom dobara upisanih na Privremenu listu nacionalnih spomenika Bosne i Hercegovine	2
2.1.2.	Donošenje odluka o proglašenju nacionalnim spomenikom dobara za koja su podnesene peticije	2
2.1.3.	Donošenje odluka kojima se utvrđuje da predložena dobra ne ispunjavaju kriterije za proglašenje nacionalnim spomenikom	3
2.1.4.	Donošenje odluka kojima se ranije donesene odluke mijenjaju, dopunjavaju, ispravljaju ili ukidaju	3
2.1.5.	Upis zabilježbe o nacionalnom spomeniku u zemljišne knjige	4
2.1.6.	Implementacija odluka Komisije – obilježavanje nacionalnih spomenika	4
2.1.7.	Davanje stručnog mišljenja na projekte rehabilitacije nacionalnih spomenika	5
2.2.	Lista ugroženih spomenika	5
3.	PROJEKTI KOMISIJE.....	5
3.1.	Kandidirani projekti	5
3.2.	Projekti za koje su odobrena sredstva	6
3.3.	Projekti završeni u 2015. godini	7
3.4.	Projekti na kojima je Komisija učestvovala kao partner u 2015. godini	7
4.	KANDIDATURA NACIONALNIH SPOMENIKA ZA UPIS NA LISTU SVJETSKJE BAŠTINE (UNESCO).....	7
4.1.	Nominacija nekropola sa stećcima za upis na Listu svjetske baštine UNESCO-a	7
4.2.	Izveštavanje o implementaciji Konvencije o zaštiti svjetske kulturne baštine (UNESCO)	9
5.	SARADNJA S INSTITUCIJAMA I TIJELIMA NADLEŽNIM ZA IMPLEMENTACIJU ANEKSA 8.	11
5.1.	Učešće Komisije u radu stručnih timova entiteta i Brčko Distrikta	11
5.1.1.	Savjet Regulacionog plana historijskog gradskog područja Počitelj	11
5.1.2.	Savjet Regulacionog plana historijskog gradskog područja Blagaj	11
5.2.	Sastanci sa nadležnim institucijama i pojedincima na provođenju Aneksa 8. ...	11
5.3.	Učešće predstavnika Komisije na konferencijama, skupovima i seminarima	12
5.4.	Učestvovanje predstavnika Komisije u radu međunarodnih tijela.....	12
6.	JAVNOST RADA	12
6.1.	Odnosi s javnošću	12
6.2.	Podizanje svijesti o značaju naslijeđa	16
6.3.	Biblioteka i dokumentacioni centar.....	16
6.4.	Baza podataka o spomenicima	17
7.	ORGANIZACIJA KOMISIJE	18
7.1.	Sastav Komisije	18
7.2.	Sjednice Komisije	18
7.3.	Sekretarijat Komisije	18
7.4.	Interni akti Komisije.....	19
7.5.	Vanjski saradnici	20
7.6.	Stručna obuka saradnika	21
7.7.	Smještaj Komisije	21
8.	PROCJENA IZVRŠENJA BUDŽETA KOMISIJE.....	21
9.	ZAKLJUČCI	22

Na osnovi člana 45. Poslovnika o radu Komisije za očuvanje nacionalnih spomenika ("Službeni glasnik BiH", br. 4/03, 33/03, 31/06, 99/06, 53/11 i 89/15), Komisija za očuvanje nacionalnih spomenika na svojoj 68. sjednici održanoj od 01. do 03. februara 2016. godine, usvojila je sljedeći

IZVJEŠTAJ O RADU KOMISIJE ZA OČUVANJE NACIONALNIH SPOMENIKA U 2015. GODINI

1. NADLEŽNOSTI KOMISIJE ZA OČUVANJE NACIONALNIH SPOMENIKA

Komisija za očuvanje nacionalnih spomenika (u daljem tekstu: Komisija) je institucija Bosne i Hercegovine uspostavljena na osnovi Aneksa 8. Općeg okvirnog sporazuma za mir u Bosni i Hercegovini i Odluke o Komisiji za očuvanje nacionalnih spomenika koju je donijelo Predsjedništvo Bosne i Hercegovine na 119. sjednici, održanoj 21.12.2001. godine, a kojom su, u skladu s odredbama Aneksa 8., utvrđeni osnovni principi i ciljevi djelovanja Komisije, te njeni primarni zadaci i ovlaštenja kao institucije Bosne i Hercegovine. Odluka je objavljena u "Službenom glasniku BiH", br. 1/02 i 10/02.

Na osnovi ovlaštenja iz Aneksa 8. Općeg okvirnog sporazuma za mir u BiH Komisija donosi odluke o proglašenju pokretnih i nepokretnih dobara nacionalnim spomenikom, primjenjujući Kriterije o proglašenju dobara nacionalnim spomenicima ("Službeni glasnik BiH", br. 33/02 i 15/03).

Na osnovi odluke Predsjedništva Bosne i Hercegovine, Komisija daje inicijativu za pokretanje postupka za zaključivanje međunarodnih ugovora, priprema prijedloge ugovora, učestvuje u prethodnim pregovorima radi zaključivanja međunarodnih ugovora na ekspertnom nivou, izvršava međunarodne ugovore, te obavlja druge poslove međunarodne saradnje u oblasti zaštite nacionalnih spomenika, koji se odnose naročito na:

- zastupanje interesa Bosne i Hercegovine u vezi sa potpisivanjem i provođenjem međunarodnih konvencija;
- rješavanje spornih pitanja od zajedničkog interesa za Bosnu i Hercegovinu i druge države odnosno međunarodne organizacije;
- odlučivanje o kandidaturi nacionalnih spomenika za upis na Listu svjetske baštine (UNESCO) i Listu 100 najugroženijih spomenika (WMW) i sl.;
- saradnju s INTERPOL-om, drugim međunarodnim organizacijama i državama u slučajevima nestanka pokretnih nacionalnih spomenika;
- pitanja procedure za izvoz pokretnih nacionalnih spomenika i davanja garancija za njihovu zaštitu u slučaju privremenog izvoza;
- davanje koncesija stranim državljanima za istraživanja koja se odnose na nacionalne spomenike;
- osiguranje sredstava iz donacija za finansiranje rada Komisije i zaštitu nacionalnih spomenika;
- angažman stranih eksperata za potrebe Komisije.

2. PROVEDENE AKTIVNOSTI

2.1. Donošenje odluka o proglašenju nacionalnim spomenicima

Na osnovi ovlaštenja iz Aneksa 8. Općeg okvirnog sporazuma za mir u BiH, Komisija donosi odluke o proglašenju pokretnih i nepokretnih dobara nacionalnim

spomenikom, primjenjujući Kriterije o proglašenju dobara nacionalnim spomenicima ("Službeni glasnik BiH", br. 33/02 i 15/03).

Komisija je od početka svog rada 2002. godine do 31. decembra 2015. godine donijela 963 odluke, od toga 810 pozitivnih (31 pokretnih i 779 nepokretnih dobara proglašeni su nacionalnim spomenicima Bosne i Hercegovine) i 153 negativnih odluka. Od ukupnog broja spomenika, **580** spomenika nalazi se na teritoriji Federacije BiH, **220** spomenika na teritoriji Republike Srpske i **10** spomenika u Brčko Distriktu BiH.

U 2015. godini Komisija je razmatrala **39 prijedloga odluka** o proglašenju nacionalnim spomenicima i donijela **30 odluka**. Odluke se objavljuju u "Službenom glasniku BiH".

Prilog 1: *Odluke o proglašenju dobara nacionalnim spomenicima, donesene u 2015. godini*

2.1.1. Donošenje odluka o proglašenju nacionalnim spomenikom dobara upisanih na Privremenu listu nacionalnih spomenika Bosne i Hercegovine

Komisija po službenoj dužnosti (bez posebnog zahtjeva), donosi odluke o proglašenju nacionalnim spomenikom za svako pojedinačno dobro upisano na Privremenu listu nacionalnih spomenika Bosne i Hercegovine ("Službeni glasnik BiH", broj 33/02). Na Privremenoj listi, koju je uspostavila Komisija za očuvanje nacionalnih spomenika u prethodnom sazivu, upisano je 776 spomenika. U periodu 2002–2015. godine Komisija je donijela konačne odluke o proglašenju nacionalnim spomenicima za ukupno **342 dobra sa Privremene liste**, odnosno **4 dobra** u toku 2015. godine.

Od ukupnog broja proglašanih dobara sa Privremene liste (342), 245 dobara se nalazi na području FBiH, 93 na području RS, a 4 na području Brčko Distrikta.

Prilog 2: *Odluke o proglašenju nacionalnim spomenicima za dobra upisana na Privremenu listu nacionalnih spomenika Bosne i Hercegovine, donesene u 2015. godini*

2.1.2. Donošenje odluka o proglašenju nacionalnim spomenikom dobara za koja su podnesene peticije

Postupak za proglašenje dobra nacionalnim spomenikom pokreće se na osnovi peticije / prijedloga za utvrđivanje dobra nacionalnim spomenikom Bosne i Hercegovine. Peticije za utvrđivanje dobra nacionalnim spomenikom podnose se Komisiji u skladu sa članom V Aneksa 8. Općeg okvirnog sporazuma za mir u BiH. Komisija je utvrdila jedinstvenu formu peticije prema vrsti dobra. Peticiju može podnijeti bilo koje pravno ili fizičko lice u Bosni i Hercegovini.

U toku 2015. godine Komisiji je upućeno 56 peticija, te 2.477 ostalih dopisa, zahtjeva i podnesaka (ukupno 2.533 akta) koji su rješavani u skladu s ovlaštenjima Komisije utvrđenim zakonom i općim aktima Komisije. Komisija je do 31.12.2015. godine ukupno primila 1656 peticija.

Prilog 3: *Lista peticija / prijedloga za proglašenje dobara nacionalnim spomenicima, primljenih u 2015. godini*

U periodu 2002–2015. godine Komisija je proglasila ukupno **496 dobara** za koje su podnesene peticije nacionalnim spomenicima Bosne i Hercegovine, odnosno **26 dobara** u toku 2015. godine. Neka dobra za koja je podnesena peticija vode se

istovremeno i na Privremenoj listi nacionalnih spomenika, samostalno ili u sklopu neke graditeljske cjeline.

Prilog 4: *Odluke o proglašenju nacionalnim spomenikom za dobra za koja su podnesene peticije, donesene u 2015. godini*

Prema odredbama Aneksa 8., do donošenja konačne odluke o proglašenju nacionalnog spomenika, a najduže do godinu dana od podnošenja peticije, sve strane trebaju se suzdržati od aktivnosti koje bi mogle ugroziti predloženo dobro, o čemu su obaviješteni svi nadležni organi i institucije na čijem se području nalaze predložena dobra.

S obzirom na veliki broj peticija, Komisija nije mogla ispoštovati rok utvrđen u članu 39. stav 2 Poslovnika o radu Komisije, prema kojem peticija treba biti riješena najkasnije u roku od godinu dana od dana njenog podnošenja. Postupak razmatranja peticija otežavala je i činjenica da uz veliki broj zahtjeva nije bila dostavljena potrebna dokumentacija o predloženom dobru (podaci o vlasništvu, lokaciji, sadašnjem stanju i dr.). Budući da je za pripremu svake pojedinačne odluke o proglašenju dobra nacionalnim spomenikom potrebno provesti iscrpno istraživanje postojeće arhivske, arhitektonske, historijske i druge građe o predloženom dobru, te s obzirom na to da bi ukidanje režima zaštite za pojedine spomenike moglo prouzrokovati aktivnosti koje bi ga mogle uništiti, Komisija je na sjednicama održanim u 2015. godini donijela **3 odluke** o produženju režima zaštite iz člana V stav 3 Aneksa 8. Općeg okvirnog sporazuma za mir u Bosni i Hercegovini, za ukupno **56 dobara**. Odluke su objavljene u "Službenom glasniku BiH". Režim zaštite produžen je do donošenja konačne odluke Komisije za očuvanje nacionalnih spomenika o proglašenju predloženih dobara nacionalnim spomenikom.

Prilog 5: *Spisak kulturno-historijskih dobara kojima je u 2015. godini produžen režim zaštite do donošenja konačne odluke Komisije*

2.1.3. Donošenje odluka kojima se utvrđuje da predložena dobra ne ispunjavaju kriterije za proglašenje nacionalnim spomenikom

Za dobra koja ne ispunjavaju Kriterije o proglašenju dobara nacionalnim spomenikom, Komisija donosi odluku kojom se utvrđuje da predloženo dobro ne ispunjava te kriterije ("negativne odluke"). U periodu 2002–2015. godine Komisija je donijela ukupno **153 odluke** kojima se odbija peticija / prijedlog za proglašenje dobara o proglašenju dobara nacionalnim spomenicima Bosne i Hercegovine, odnosno **6 odluka u 2015. godini**. Od ukupnog broja negativnih odluka, 127 odluka su za dobra koja se nalaze na području FBiH, 24 na području RS, a 2 na području Brčko Distrikta.

Isti postupak primjenjuje se i za nacionalne spomenike koji su uvršteni na Privremenu listu nacionalnih spomenika BiH, a Komisija utvrdi da ne ispunjavaju Kriterije, te donese konačnu odluku. Sve "negativne" odluke su objavljene u "Službenom glasniku BiH".

Prilog 6: *Odluke kojima se utvrđuje da dobro ne ispunjava kriterije za proglašenje nacionalnim spomenikom, donesene u 2015. godini*

2.1.4. Donošenje odluka kojima se ranije donesene odluke mijenjaju, dopunjavaju, ispravljaju ili ukidaju

Odredbom člana 40.a. Poslovnika o radu Komisije za očuvanje nacionalnih spomenika utvrđeni su slučajevi u kojima Komisija može odlučiti o izmjeni ili dopuni ranije donesene odluke o proglašenju dobra nacionalnim spomenikom. Izmjene i

dopune odluke u propisanim slučajevima donose se na način i prema postupku propisanim za donošenje odluke o proglašenju dobra nacionalnim spomenikom.

Komisija je u periodu 2002–2015. donijela ukupno **68** pojedinačnih odluka o izmjenama, dopunama ili ispravkama odluka o proglašenju dobara nacionalnim spomenicima, odnosno **8 odluka u 2015. godini**.

Prilog 7: Odluke o izmjenama, dopunama, ispravkama ili ukidanju odluka Komisije, donesene u 2015. godini

2.1.5. Upis zabilježbe o nacionalnom spomeniku u zemljišne knjige

Komisija je u periodu 2002–2015. godine uputila ukupno **752¹** zahtjeva nadležnim općinskim sudovima za upis zabilježbe o nepokretnim nacionalnim spomenicima u zemljišne knjige (zahtjev se upućuje nakon stupanja odluke na snagu, odnosno nakon objave u "Službenom glasniku BiH"). Zaključno sa 31.12.2015. godine, Komisiji je dostavljeno **520 rješenja** kojim se dozvoljava upis nacionalnih spomenika u zemljišne knjige u cijelosti, **19 rješenja o djelimičnom upisu** (dio spomenika se iz određenog razloga ne može upisati u ZK, te se za taj dio odbija zahtjev, 29 rješenja o upisu u katastarski operat (tamo gdje nema zemljišnih knjiga), te **132 rješenja** kojima se odbija zahtjev za upis zabilježbe o nacionalnom spomeniku u ZK. Najčešći razlog za odbijanje zahtjeva za upis je što u odlukama Komisije nema katastarskih podataka po starom premjeru, bez kojih sudovi, shodno zakonu, ne mogu izvršiti upis u zemljišne knjige. Za **35 zahtjeva** u toku je postupak upisa (pismena ili usmena informacija od nadležnog referenta), dok za **19 zahtjeva** Komisiji još nije dostavljen nikakav odgovor (upućene su urgencije).

2.1.6. Implementacija odluka Komisije – obilježavanje nacionalnih spomenika

Komisija je uspostavila jedinstven sistem obilježavanja nacionalnih spomenika u Bosni i Hercegovini i dosada postavila informativne table za 332 spomenika.

- 15.04.2015. godine upućen odgovor JU Zavod za zaštitu i korištenje kulturno-historijskog i prirodnog naslijeđa TK, koji se odnosi na upit o postavljanju infotable na nacionalni spomenik Stari grad u Gradačcu.
- 20.04.2015. godine, u prostorijama Komisije održan sastanak predstavnika firme Gong i Komisije u vezi sa finalizacijom ugovorenih obaveza na izradi i postavljanju infotabli.
- 14.07.2015. godine, u prostorijama firme Gong održan sastanak predstavnika navedene firme i Komisije u vezi s ispostavljenom fakturam za dodatno pređene kilometre u odnosu na one definirane ugovorom.
- Dostavljen odgovor Općini Ključ vezano za pitanje općinskog vijećnika o finansiranju izrade i postavljanja infotable za Stari grad, Ključ.
- Firmi "Gong" poslan upit, a naknadno i urgencija vezano za oštećenja infotabli na Eminagića kući i Starom gradu u Tešnju.
- Pripremljena i dostavljena grafička priprema infotable Franjevačkom samostanu Duha Svetoga Fojnica.
- Urađen prijedlog projekta obilježavanja nacionalnih spomenika koji će biti dostavljen općinama u cilju prikupljanja sredstava za izradu i postavljanje infotabli.
- Ažurirana evidencija infotabli koje su dosada postavljene.

¹ Od ukupno 810 proglašanih dobara, za 58 dobara nije podnesen zahtjev, jer odluke još nisu objavljene (27) ili se radi o pokretnim dobrima (31) koja se ne upisuju u ZK.

- Shodno upitu predstavnika Grada Sarajeva, dostavljen tekst i dizajn informacione table za zgradu Vijećnice u Sarajevu, zajedno sa tehničkom specifikacijom.

2.1.7. Davanje stručnog mišljenja na projekte rehabilitacije nacionalnih spomenika

U 2015. godini Komisija je, na zahtjev Federalnog ministarstva prostornog uređenja, Službe iz Brčko Distrikta BiH i drugih institucija, dala stručno mišljenje na projektnu dokumentaciju za izvođenje radova na 35 nacionalnih spomenika.

Prilog 8: *Pregled stručnih mišljenja datih na projekte rehabilitacije nacionalnih spomenika u 2015. godini*

2.2. Lista ugroženih spomenika

Komisija je uspostavila Listu ugroženih nacionalnih spomenika za koje je neophodno provesti hitne mjere zaštite da bi se spriječilo njihovo potpuno uništenje, a u cilju usmjeravanja pažnje svih odgovornih entitetskih i državnih tijela uprave, ali i mogućih donatora i investitora na one slučajeve nacionalnih spomenika kojima prijete nestanak, ukoliko odmah ne budu poduzete neophodne aktivnosti za njihovo spašavanje.

Do kraja 2015. godine na Listi se nalaze **83 najugroženija spomenika**. Komisija je uspostavila sistem praćenja stanja i aktivnosti vezanih za ugrožene spomenike sa Liste, na osnovi utvrđenih indikatora. Na osnovi rezultata provedenog monitoringa, Komisija poduzima i predlaže aktivnosti nadležnim institucijama na otklanjanju i ublažavanju faktora koji ugrožavaju spomenik. Prema Zakonu o provođenju odluka Komisije za zaštitu nacionalnih spomenika ("Službene novine F BiH", br. 2/02, 27/02, 6/04 i 51/07, "Službeni glasnik Republike Srpske", br. 9/02, 70/06 i 64/08 i "Službeni glasnik Brčko Distrikta BiH", br. 2/02 i 19/07), nacionalni spomenici imaju najviši stepen zaštite. Od vlada entiteta i nadležnih organa Komisija je zatražila da poduzmu sve neophodne mjere iz njihove nadležnosti s ciljem zaštite ugroženih spomenika. O stanju ugroženih spomenika i poduzetim aktivnostima Komisija redovno obavještava javnost putem konferencija za štampu.

Prilog 9: *Lista ugroženih spomenika*

3. PROJEKTI KOMISIJE

Za nacionalne spomenike koji se nalaze na Listi ugroženih spomenika Komisija se obraća zahtjevom za finansijsku podršku međunarodnim subjektima, kao i vlastima u Bosni i Hercegovini na svim nivoima. Aktivnosti na ovim projektima provodi Komisija prema ugovorima sklopljenim sa donatorima, a u skladu sa zakonskim propisima u BiH.

3.1. Kandidirani projekti

Za sredstva Fonda ambasade SAD u BiH za zaštitu kulturnog naslijeđa za 2015/2016. godinu kandidirani su sljedeći projekti:

- Zemaljski muzej BiH u Sarajevu – projekat rehabilitacije;
- Projekat "Moja Bosna i Hercegovina – moje naslijeđe";
- Crkva sv. Marije sa Tornjem sv. Luke u Jajcu – projekat zaštite i prezentacije lokaliteta;
- Arheološko područje Mili – Krunidbena i grobna crkva bosanskih kraljeva u Arnautovićima, Visoko – projekat arheološkog istraživanja;

- Stari grad Dobor u Modriči – projekat istraživanja i izrade projekta zaštite i prezentacije lokaliteta;
- Most u Klepcima, Čapljina – projekat restauracije;
- Hamam u Blagaju kod Mostara – projekat konzervacije;
- Arheološko područje Skelani, Srebrenica – projekat preventivne konzervacije mozaika iz 4. vijeka p.n.e.

Za sredstva Ambasade Savezne Republike Njemačke u BiH, kandidirani su projekti:

- Konzervacija i restauracija enterijera Miščine džamije u Sarajevu – faza 3;
- Preventivna konzervacija zbirke starih slika u samostanu sv. Bonaventure, Visoko;
- Tehnički snimak postojećeg stanja, izrada preliminarne tehničke procjene i hitni radovi zaštite na zgradi kina Centar u Tuzli;
- Konzervacija i prezentacija mozaika iz 4. vijeka p.n.e. na arheološkom lokalitetu Skelani, Srebrenica.

Za sredstva Evropske unije putem IPA fondova, kandidiran je projekt Research package for inclusive approach towards World War II memorial architecture on territory of Western Balkans countries – Bosnia and Herzegovina.

Komisija potvrdila učešće na projektu STADIUM u sklopu programa Interreg ADRION.

Evropska komisija je 29.10.2015. godine dostavila obavještenje o odbijanju prijedloga projekta Research package for inclusive approach towards World War II memorial architecture on territory of Western Balkans countries – Bosnia and Herzegovina.

3.2. Projekti za koje su odobrena sredstva

- **Restauracija mosta iz 16. vijeka na rijeci Žepi, Rogatica** (donator: Specijalni fond američkog ambasadora u BiH za zaštitu kulturnog naslijeđa; period realizacije: 01.04.2013.–31.12.2015.; vrijednost ugovora: 62.600,00 \$; aktivnosti: izrada projektne dokumentacije, izvođenje urgentnih radova na konzervaciji mosta, kampanja “Moja BiH – moje naslijeđe“ u širem području Rogatice);
- **Zgrada Crvenog krsta u Sarajevu** – “Projekat parcijalne sanacije enterijera zgrade Društva Crvenog krsta / križa BiH u Sarajevu – III faza (donator: Specijalni fond američkog ambasadora u BiH za zaštitu kulturnog naslijeđa; broj ugovora S-BK-800-15-GR-161 potpisan dana 16.09.2015. godine. Projekt-koordinator: Adi Ćorović, direktorica projekta Mirela Mulalić-Handan, period realizacije: 30.09.2015.–31.12.2016.; vrijednost ugovora 120.000,00 \$).
Dosada je formiran tim i izrađen prijedlog Tripartitnog sporazuma između Komisije, vlasnika Društva Crvenog krsta BiH i Federalnog zavoda za zaštitu. Sporazum još nije potpisan i nisu započete aktivnosti, s obzirom na to da se čeka zvanično odobrenje Američke ambasade da Projekt izvede vlasnik, a da se za taj iznos novca uveća budžet izvođačkih radova na objektu, u sklopu aktivnosti Komisije.
- **Mišćina džamija u Sarajevu** – Projekt "Konzervatorski i restauratorski radovi u enterijeru" (donator: Vlada Republike Njemačke; ugovor broj 06.3-35.12-107/15-1, potpisan dana 03.06.2015. godine. Projekt-koordinatorice: Mejra Hodžić / Medina Hadžihasanović-Katana od 21.04.2015, direktorica

projekta Mirela Mulalić-Handan, period realizacije: 03.06.2015.–15.11.2015. (produžena implementacija za 2016. godinu); vrijednost ugovora 37.180,00 eura (31.680,00 eura njemačka vlada; 5.500,00 eura Komisija);

- **Historijski muzej u Sarajevu** – Projekat "Restauratorski radovi dijela krova" (donator: Specijalni fond američkog ambasadora u BiH za zaštitu kulturnog naslijeđa; broj ugovora S-BK800-14-GR-237 potpisan dana 24.09.2014. godine. Projekt-koordinatori: Mejra Hodžić / Emir Softić od 14.10.2015, direktorica projekta Mirela Mulalić-Handan, period realizacije: 30.9.2014.–31.12.2015.; vrijednost ugovora 77.600,00 \$ (63.250 \$ američki ambasador; 14.350 \$ Komisija);
- **Zemaljski muzej u Sarajevu** – Projekat "Preventivna konzervacija zbirki" (donator: Specijalni fond američkog ambasadora u BiH za zaštitu kulturnog naslijeđa; broj ugovora S-LMAQM-15-GR-1173 potpisan dana 10.09.2015. godine. Projekt-koordinatorica: Medina Hadžihasanović-Katana, direktorica projekta Mirela Mulalić-Handan, period realizacije: 10.9.2015.–31.12.2018.; vrijednost ugovora 625.000,00 \$);
- **EXPO.AUS – Restauracija mlinica na području Mostara, Blagaja i Stoca** (donator: Evropska unija putem IPA fondova; period realizacije: 10.2012.–08.2015. godine; vrijednost ugovora (u dijelu koji implementira Komisija: 257.513,41 eura.). Period realizacije 09.2012.–08.2015. (projekt produžen do 28.02.2016. godine).

3.3. Projekti završeni u 2015. godini

Završen je projekt primarne konstruktivne sanacije krova Zgrade Crvenog krsta u Sarajevu – II faza.

3.4. Projekti na kojima je Komisija učestvovala kao partner u 2015. godini

- Projekat TEMPUS-BIHERIT (donator: Izvršna agencija Evropske unije za obrazovanje, audiovizuelno i kulturu preko Univerziteta u Sarajevu; period realizacije: 14.10.2012.–14.10.2014. godine; vrijednost ugovora (u dijelu koji implementira Komisija): 4.408,40 eura). Projekt je završen;
- Projekt uspostavljanja evropske mreže o kulturnom naslijeđu (EUROPEAN HERITAGE NETWORK – HEREIN) (donator: Vijeće Evrope; period realizacije: od 1999. godine bez ograničenja).

Prilog 10: Izvještaji o projektima koje implementira Komisija

4. KANDIDATURA NACIONALNIH SPOMENIKA ZA UPIS NA LISTU SVJETSKJE BAŠTINE (UNESCO)

4.1. Nominacija nekropola sa stećcima za upis na Listu svjetske baštine UNESCO-a

Koordinator izrade nominacijskog dosijea: Dubravko Lovrenović, član Komisije.

Koordinatorica izrade Plana upravljanja: Mirela Mulalić-Handan, pomoćnica izvršnog dužnosnika za naslijeđe.

Inicijator projekta "Nominacija stećaka – srednjevjekovnih nadgrobnih spomenika – na Listu svjetske baštine UNESCO-a" na regionalnom nivou je Komisija za očuvanje nacionalnih spomenika Bosne i Hercegovine. Pismo namjere o

uspostavljanju međuinstitucionalne saradnje na pripremi i prezentaciji zajedničkog projekta izrade nominacijskog dokumenta: "Nominacija stećaka – srednjovjekovnih nadgrobnih spomenika – za Upis na listu svjetske kulturne baštine UNESCO-a" potpisano je 02.11.2009. godine u Sarajevu. Potpisnici Pisma su Sredoje Nović, ministar civilnih poslova BiH, Ljiljana Ševo, predsjedavajuća Komisije za očuvanje nacionalnih spomenika, Nebojša Bradić, ministar kulture Republike Srbije, Božo Biškupić, ministar kulture Republike Hrvatske i Branislav Mićunović, ministar kulture, sporta i medija Crne Gore.

Formirano je administrativno tijelo i stručni tim kojeg čine koordinatori za izradu Nominacijskog dosijea i koordinatori za izradu Plana upravljanja, a koje su imenovali nadležne institucije država potpisnica Pisma namjere.

U ime Komisije za očuvanje nacionalnih spomenika BiH prof. dr. Dubravko Lovrenović, član Komisije, imenovan je koordinatorom za izradu Nominacijskog dosijea, a Mirela Mulalić-Handan, izvršna dužnosnica, koordinatoricom za izradu Plana upravljanja. Ministarstvo civilnih poslova BiH imenovalo je u administrativno tijelo: Biljanu Čamur, pomoćnicu ministra za nauku i kulturu i Edina Veladžića, stručnog savjetnika za evropske integracije i međunarodnu kulturnu saradnju.

Realizirane aktivnosti u 2015. godini:

- Državnoj Komisiji za saradnju s UNESCO-om predat je završen kompletan Nominacijski dokument, tj. Nominacijski dosije i Plan upravljanja sa pratećim prilogima. Preko Ambasade BiH u Francuskoj, nominacija je službeno predata Centru za svjetsku baštinu u roku.
- Održan niz sastanaka predstavnika Ministarstva civilnih poslova i Komisije, a za potrebe organiziranja svečanosti povodom predaje Nominacijskog dosijea i Plana upravljanja Centru za svjetsku baštinu. Također su održani sastanci i sa predstavnicima Stručnih službi zajedničke poslove institucija BiH, izvršavanje aktivnosti na slanju pozivnica, pripremi nepohodne tehničke podrške, rezervaciji prostora itd.
- 10.03.2015. godine, u zgradi Parlamentarne skupštine BiH održana je svečanost povodom Nominacije stećaka – srednjovjekovnih nadgrobnih spomenika – za upis na Listu svjetske baštine UNESCO-a, u organizaciji Komisije za očuvanje nacionalnih spomenika u saradnji sa Ministarstvom civilnih poslova BiH.
- Izvršavanje pripremnih aktivnosti vezano za posjetu eksperata ICOMOS-a Bosni i Hercegovini, Hrvatskoj, Crnoj Gori i Srbiji. Aktivnosti su se odnosile na održavanje sastanka sa predstavnicima MCP, uspostavljanje kontakta i e-mail prepisku sa predstavnicima ICOMOS-a i imenovanim ekspertima, te rad na izradi prijedloga plana obilaska koji je dostavljen navedenim ekspertima i učesnicima na izradi nominacijskog dosijea.
- Održani sastanci u organizaciji MCP-a, 27.07., 10.08. i 11.09.2015., a vezano za organizaciju predstojeće ICOMOS misije.
- 15.09.2015. godine održan sastanak sa ICOMOS ekspertom Sergiu Musteata vezano za tehničku evaluaciju nominacije.
- Izvršena tehnička misija ICOMOS eksperata na nominiranim nekropolama sa stećcima iz Bosne i Hercegovine, u periodu 15.–22.09.2015. godine.
- 21.09.2015. godine u Konjicu je održan međudržavni sastanak svih zemalja učesnica u projektu s ekspertima ICOMOS-a.
- 27.09.2015. godine održan sastanak s ICOMOS eksperticom Cynthiom Dunning vezano za tehničku evaluaciju nominacije.

- ICOMOS dostavio poziv za prisustvo panel-sastanku 01.12.2015. godine, u Parizu.
- ICOMOS zatražio dostavljanje dodatnih informacija koje se odnose na *Serial Approach* i *Number of inhabitants in the buffer zones*.
- 16.10.2015. godine u organizaciji MCP, održan sastanak predstavnika MCP, entitetskih zavoda za zaštitu naslijeđa i Komisije, a na kojem su prezentirane aktivnosti u toku realiziranja tehničke misije ICOMOS-a.
- 20.10.2015. godine, održan sastanak predstavnika UNESCO ureda u BiH, MCP i Komisije na temu poziva na ICOMOS Panel u Parizu.
- Na zahtjev ICOMOS-a za dodatna obrazloženja pojedinih dijelova nominacijskog dokumenta, Komisija pripremila odgovor koji je dostavljen ICOMOS središnjem uredu u Parizu.
- Predstavnici stručnog tima iz Srbije, Hrvatske i Crne Gore dostavili svoje odgovore Komisiji koje su uputili ICOMOS-u.
- Vršena je kontinuirana razmjena informacija sa članovima stručnog tima iz ostalih zemalja učesnica projekta, a vezano za učestvovanje na ICOMOS panelu u Parizu.
- Komisija je Ambasadi BiH u Francuskoj dostavila dokument koji je poslan ICOMOS-u.
- ICOMOS-u dostavljena informacija o učesnicima BiH na panel-sastanku u Parizu.
- 01.12.2015. održan panel-sastanak u ICOMOS središnjem uredu u Parizu. Sastanku su prisustvovali predstavnici stručnog tima za izradu nominacije iz Srbije, Hrvatske, Crne Gore i Bosne i Hercegovine.

4.2. Izveštavanje o implementaciji Konvencije o zaštiti svjetske kulturne baštine (UNESCO)

Saradnik za praćenje implementacije Konvencije: Tarik Jazvin.

39. zasjedanje Komiteta za svjetsku baštinu održano je od 28.06.–08.07.2015. godine u Bonnu, Njemačka. Na zasjedanju nije bilo govora o dobrima iz Bosne i Hercegovine koja su upisana na Listu svjetske baštine.

Stari most sa Starim gradom Mostar

U toku 2015. godine izvršene su sljedeće aktivnosti:

- 15.01.2015. godine Agencija “Stari grad”, Mostar dostavila godišnji izvještaj za 2014. godinu.
- 03.07.2015. godine, predstavnici Komisije su učestvovali na obilježavanju desete godišnjice upisa Starog mosta sa Starim gradom Mostar na Listu svjetske baštine, u organizaciji Grada Mostara. Održana je konferencija na temu “Historijski urbani pejzaži” kojoj su prisustvovali međunarodni eksperti UNESCO-a, predstavnici nadležnih institucija za zaštitu naslijeđa, turističkih zajednica, te Grada mostara. U okviru ovog događaja, Komisija je u prostorijama dućana Mujage Komadine postavila izložbu bosanskohercegovačkih dobara upisanih na Listu svjetskog naslijeđa i Tentativnu listu svjetskog naslijeđa UNESCO-a.
- Agencija “Stari grad”, Mostar informirala da je planirani rok za izvođenje radova na hotelu “Ruža” do kraja 2016. godine. Izvršeno fotografiranje trenutnih radova na objektu.

- Geodet je snimio reperne tačke mosta na kamenoj ogradi i vijencu nakon čega su rezultati upoređeni sa prethodnim mjerenjima.
- Elektronska stanica za monitoring mosta koja bi pružila pouzdane podatke o stanju konstrukcije Starog mosta nije više u funkciji. Zbog niskog stepena efikasnosti, uređaj više nije neophodan za monitoring mosta.

Most Mehmed-paše Sokolovića u Višegradu

U toku 2015. godine izvršene su sljedeće aktivnosti:

- 17.02.2015. godine u prostorijama Komisije održan sastanak sa predstavnicima TIKa-e vezano za organizaciju javne prezentacije projekta "Restauracije mosta Mehmed-paše Sokolovića u Višegradu". Na tu temu održan niz sastanaka i u martu, kako bi se realizirale aktivnosti na pripremi nepohodne tehničke podrške, rezervaciji prostora, izrade liste pozivnica, izrade prijedloga programa, dostavljanje poziva i sl.
- 19.03.2015. godine, u Višegradu održan sastanak u vezi sa nastavkom radova na mostu (radovi sa sedrom, fugiranje i vanjsko uređenje mosta). Prisustvovali su predstavnici TIKa ureda u BiH, Direkcije za ceste Republike Turske, izvođača radova "ER-BU", UNESCO ureda u BiH, Ministarstva prosvjete i kulture RS, RZZKIPNRS, Instituta za materijale i konstrukcije u Sarajevu, Instituta za materijale i konstrukcije iz Banje Luke, općine Višegrad, te Komisije za očuvanje nacionalnih spomenika.
- 20.03.2015. godine, u zgradi Parlamentarne skupštine BiH, održana je javna prezentacija "Projekta restauratorskih i konzervatorskih radova na mostu Mehmed-paše Sokolovića u Višegradu", u organizaciji TIKa ureda u BiH i Komsije.
- 11.06.2015. godine, u Višegradu je održan sastanak vezano za trenutne radove na restauraciji mosta. Prisustvovali su predstavnici TIKa ureda u BiH, predstavnici Direkcije za ceste Republike Turske, izvođača radova "ER-BU", UNESCO ureda u BiH, RZZKIPNRS, Arhitektonsko-građevinsko-geodetskog fakulteta u Banjoj Luci, Instituta za materijale i konstrukcije iz Banje Luke, općine Višegrad, te Komisije za očuvanje nacionalnih spomenika.
- TIKa dostavila kompletne izvještaje o aktivnostima na restauraciji mosta koje je izradila Generalna direkcija za ceste Republike Turske.
- 11.08.2015. godine održan sastanak u prostorijama Općine Višegrad, na temu trenutnih i budućih radova na restauraciji Mosta Mehmed-paše Sokolovića u Višegradu. Sastanku su prisustvovali predstavnici Generalnog ureda TIKa u Ankari, Ureda TIKa u BiH, Direkcije za ceste Republike Turske, izvođača radova "ER-BU", UNESCO ureda u Sarajevu, Zavoda RS, Instituta za ispitivanje materijala i konstrukcija u Sarajevu, Instituta za ispitivanje materijala i konstrukcija u Banjoj Luci, Općine Višegrad i Komisije. Urađen i dostavljen izvještaj sa sastanka.
- 26.09.2015. godine izvršen obilazak lokaliteta Mosta sa Slavišom Miškovićem, načelnikom općine Višegrad, i Biljanom Borenović, saradnicom za urbanizam u općini Višegrad.
- Radovi na restauraciji mosta su obustavljeni do aprila 2016. godine kada se planira nastavak. Zadnji radovi su se odnosili na prilaz rampi sa lijeve obale, te uređenje prilaznog trga na most sa desne obale rijeke.

Prilog 11: Izvještaj o radu Agencije "Stari grad" za 2015. godinu

LISTA 100 NAJUGROŽENIJIH SPOMENIKA (WMW)

Urađena i predata aplikacija za nominiranje Kasarne Jajce u Sarajevu, na Listu 100 najugroženijih spomenika za 2015. godinu. Aplikacija nije odobrena.

5. SARADNJA S INSTITUCIJAMA I TIJELIMA NADLEŽNIM ZA IMPLEMENTACIJU ANEKSA 8.

U toku 2015. godine Komisija je, u skladu sa svojim ovlaštenjima, nastavila ranije uspostavljenu saradnju sa nadležnim institucijama i tijelima Bosne i Hercegovine, entiteta, Distrikta Brčko, gradova, kantona i općina o pitanjima značajnim za rad Komisije, a u skladu sa Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini, kojim je, između ostalog, propisana obavezna saradnja organa i institucija na svim nivoima vlasti sa Komisijom.

5.1. Učešće Komisije u radu stručnih timova entiteta i Brčko Distrikta

5.1.1. Savjet Regulacionog plana historijskog gradskog područja Počitelj

Članica Savjeta: Orjana Lenasi, saradnica za graditeljske cjeline i kulturne krajolike.

Rješenjem Federalnog ministarstva prostornog uređenja, broj: 02-23-1-1187/10-1, od 16.09.2010. godine, formiran je Savjet Regulacionog plana historijskog gradskog područja Počitelj za period od 2008. do 2018. godine, sa osnovnim zadatkom praćenja pripreme i izrade Regulacionog plana "Historijske gradske jezgre Počitelj" za period 2008. do 2018. godine.

U toku 2015. godine nije održana niti jedna sjednica Savjeta Regulacionog plana Počitelja, odnosno nije bilo nikakvih aktivnosti.

5.1.2. Savjet Regulacionog plana historijskog gradskog područja Blagaj

Članica Savjeta: Orjana Lenasi, saradnica za graditeljske cjeline i kulturne krajolike. Rješenjem Federalnog ministarstva prostornog uređenja, broj: 05-23-1-767/15 od 21.07.2015. godine, formiran je Savjet Regulacionog plana historijskog gradskog područja Blagaj za period od 10 godina u novom sazivu.

Komisija je na svojoj 66. sjednici razmatrala prijedlog Prednacrt RP. Izvršen je uvid u dostavljenu dokumentaciju te sačinjena detaljna Analiza prijedloga Prednacrt koja je proslijeđena, sa obavještenjem – zaključkom Komisije, Federalnom ministarstvu prostornog uređenja: "...da se svi dijelovi regulacionog plana koji su u suprotnosti sa odlukama Komisije moraju izmijeniti i uskladiti sa mjerama zaštite utvrđenim relevantnim odlukama". Navedeno obavještenje je proslijeđeno u kopiji i Federlanom ministarstvu kulture i sporta – Zavodu za zaštitu spomenika.

Federalno ministarstvo prostornog uređenja je uputilo dopis Komisiji, broj: 02-23-1-11/15-27 od 18.12.2015. godine, u kojem obavještavaju Komisiju da su neki dijelovi dostavljene Analize njima neprihvatljivi.

5.2. Sastanci sa nadležnim institucijama i pojedincima na provođenju Aneksa 8.

U toku 2015. godine realizirani su brojni sastanci Komisije sa predstavnicima nadležnih organa na svim nivoima državne vlasti, predstavnicima institucija nadležnih za zaštitu kulturnog naslijeđa Bosne i Hercegovine, predstavnicima vjerskih zajednica, međunarodnih organizacija i drugih institucija i pojedinaca s ciljem

uspostavljanja ili unapređenja saradnje Komisije sa navedenim subjektima u postupku donošenja i implementacije odluka Komisije, osiguravanja sredstava za provođenje mjera zaštite nacionalnih spomenika u entitetskim budžetima i sredstava za rad Komisije, te rješavanja problema koji su usporavali i otežavali implementaciju Aneksa 8. i Zakona o provođenju odluka Komisije za očuvanje nacionalnih spomenika.

Prilog 12: Pregled sastanaka predstavnika Komisije sa nadležnim institucijama i pojedincima na provođenju Aneksa 8. u 2015. godini

5.3. Učešće predstavnika Komisije na konferencijama, skupovima i seminarima

Prilog 13: Pregled učešća predstavnika Komisije na konferencijama, skupovima i seminarima u inozemstvu u 2015. godini

5.4. Učešće predstavnika Komisije u radu međunarodnih tijela

U toku 2015. godine, u skladu sa svojim ovlaštenjima, Komisija je zastupala interese Bosne i Hercegovine u međunarodnim tijelima i učešćem na konferencijama i drugim međunarodnim skupovima u vezi s oblašću zaštite naslijeđa.

Amra Hadžimuhamedović i Adi Ćorović su nastavili s aktivnostima kao izabrani eksperti međunarodnog ekspertnog savjeta Fondacije Romualdo del Bianco.

Amra Hadžimuhamedović je nastavila s aktivnostima kao izabrana članica Međunarodnog naučnog komiteta ICOMOS-a za teoriju i filozofiju konzervacije kulturnog naslijeđa.

Mirzah Fočo i Mirela Mulalić-Handan su nastavili s aktivnostima kao izabrani eksperti Regional Expert Poola Ljubljana Process II Vijeća Evrope.

Prilog 14: Pregled učešća predstavnika Komisije u radu međunarodnih tijela u 2015. godini

6. JAVNOST RADA

6.1. Odnosi s javnošću

U skladu sa **godišnjim Planom rada i poslovanja**, Komisija informira javnost o svom radu, donesenim odlukama, zaključcima i stavovima, te drugim aktivnostima koristeći razne komunikacijske kanale (posredni, neposredni i putem medija) i alate (npr. konferencije za medije, izjave za medije, organizaciju medijskih i drugih promotivnih događaja, web-prezentacija, promotivni materijali itd.).

Pored toga, Komisija zaprima upite bh. medija, ali i medija iz inozemstva koji se odnose na sljedeće:

- upiti iz djelokruga rada Komisije (odluke o proglašenju dobara nacionalnim spomenicima), zatim upiti o trenutnom stanju nacionalnih spomenika, mjere njihove zaštite i očuvanja, te informacije u vezi s eksploatiranjem nekog dobra (zakonske odredbe i sl.);
- pored toga novinari su u nekoliko slučajeva ukazali na neki problem (npr. urušavanje nekog dobra, propadanje i sl.).

Na osnovi sistematizacije institucije i opisa radnih zadataka, svi upiti se prosljeđuju u protokol, te PR službeniku, koji tražene informacije uglavnom obezbjeđuje nakon konsultacija sa ID, i saradnicima nadležnim za tu oblast. PR službenik je dužan informaciju prilagoditi formi prihvatljivoj za medije i dostaviti je na usaglašavanje članovima Komisije. Tek nakon usaglašavanja svih članova Komisije, informacija se dostavlja medijima.

Ukoliko je u pitanju izjava za elektronski medij (TV ili radio), poduzimaju se koraci za koordiniranje sagovornika, odnosno članova Komisije.

Tokom 2015. godine odnosi s javnošću obuhvatali su sljedeće aktivnosti:

1. **Odnosi s medijima** (reaktivno i proaktivno obavještavanje medija – saopćenja, pozivi, najave, izjave, prilozi i sl.). Tokom 2015. godine zaprimljeno na protokol 30 medijskih upita, 17 saopćenja za javnost distribuirano medijima, te 9 poziva / najava medijima.
2. **Konferencije za medije (5 press-konferencija održano):**
 - a) u sklopu sjednica Komisije održane su 3 konferencije za medije kojima je prisustvovala većina medijskih kuća u BiH i na kojima su novinari informirani o pozitivnim i negativnim odlukama o proglašenju nacionalnih spomenika BiH, ugroženim spomenicima, odlukama o produžetku režima zaštite određenih dobara, te drugim zaključcima sa sjednica;
 - b) pored toga održane su 2 press-konferencije u vezi sa projektima koje realizira Komisija:
 - **02.04.2015. godine**, Komisija za očuvanje nacionalnih spomenika organizirala je press-konferenciju povodom potpisivanja ugovora s Ambasadom SAD-a u BiH za **“Projekt rehabilitacije krova Historijskog muzeja BiH“** u iznosu od 66.850,00 USD. Press-konferencija je održana u zgradi Parlamenta BiH. Na press-konferenciji novinarima su se obratile: Nj. E. Maureen Cormack, ambasadorica SAD-a u BiH, Amra Hadžimuhamedović, predsjedavajuća Komisije za očuvanje nacionalnih spomenika i Elma Hašimbegović, direktorica Historijskog muzeja BiH;
 - **02.06.2015. godine**, Komisija za očuvanje nacionalnih spomenika organizirala je press-konferenciju povodom potpisivanja ugovora sa Njemačkom ambasadom u Bosni i Hercegovini za **“Projekt konzervatorskih i restauratorskih radova u enterijeru Mišćine džamije u Sarajevu”** u iznosu od 37.180,00 EUR. Press-konferencija je održana u zgradi Evropske komisije u Sarajevu. Izjave za medije dali su: ambasador Savezne Republike Njemačke u BiH, Nj. E. Christian Hellbach i Amra Hadžimuhamedović, predsjedavajuća Komisije za očuvanje nacionalnih spomenika BiH.
3. **Događaji u cilju podizanja svijesti o kulturnom naslijeđu (5 promotivnih događaja)**
 - Komisija za očuvanje nacionalnih spomenika u saradnji s Ambasadom SAD-a u BiH i Društvom Crvenog krsta / križa BiH upriličila je svečanu ceremoniju povodom završetka projekta Primarna konstruktivna sanacija Zgrade Društva Crvenog krsta / križa BiH 04. februara 2015. godine u sali kina “Sutjeska“ u zgradi Društva Crvenog krsta / križa BiH. Ceremoniju je otvorila ambasadorica SAD u BiH, Nj. E. gđa. Maureen E. Cormack, a nakon njenog obraćanja, obratili su se i gradonačelnik Grada Sarajeva, prof. dr. Ivo Komšić, predsjedavajući Komisije za očuvanje nacionalnih spomenika, prof. dr. Dubravko Lovrenović, predsjednik Društva Crvenog krsta / križa BiH, gosp. Rajko Lazić, a projekt je predstavio dr. sc. Adi Ćorović, dipl. ing. arh. – projekt-kordinator iz Komisije za očuvanje nacionalnih spomenika, dok je generalni sekretar Crvenog krsta / križa BiH, gosp. Branko Leko u svom

obraćanju uputio poziv na donacije u skladu s izloženim daljim planom projekta.

- **10. marta 2015. godine**, Komisija za očuvanje nacionalnih spomenika BiH i Ministarstvo civilnih poslova BiH organizirali su **svečanost povodom Nominacije stećaka za upis na Listu svjetske baštine UNESCO-a** u zgradi Parlamentarne skupštine BiH. Svečanosti je prisustvovalo više od 80 zvanica svih nivoa vlasti, te diplomatsko-konzularni predstavnici u BiH. Zvanicama su se, uz ostale stručnjake iz susjednih zemalja, obratili ministar MCP Sredoje Nović i predsjedavajući Komisije za očuvanje nacionalnih spomenika BiH Dubravko Lovrenović.
 - **20. marta 2015. godine**, Komisija za očuvanje nacionalnih spomenika BiH i Turska agencija za saradnju i koordinaciju (TIKA) u BiH organizirali su **javnu prezentaciju Projekta konzervacijskih i restauracijskih radova na Mostu Mehmed-paše Sokolovića u Višegradu** u zgradi Parlamentarne skupštine BiH. Zvanicama su se obratili predsjedavajući Komisije za očuvanje nacionalnih spomenika BiH Dubravko Lovrenović, direktor TIKA-e za BiH Huseyin Şanlı, zamjenik generalnog direktora Direkcije za ceste Republike Turske Gökalp Yılmaz, dok je projekat konzervacijskih i restauracijskih radova na Mostu Mehmed-paše Sokolovića u Višegradu prezentirala Halide Sert, direktorica Odjela za historijske mostove Direkcije za ceste Republike Turske.
 - Povodom obilježavanja **Međunarodnog dana spomenika i spomeničkih cjelina, 18. aprila 2015. godine**, Komisija za očuvanje nacionalnih spomenika je organizirala **“Dan otvorenih vrata” i predavanja za studente Arhitekture, Arheologije, Historije i Historije umjetnosti, konzervacije i restauracije**. Predsjedavajuća Komisije za očuvanje nacionalnih spomenika Amra Hadžimuhamedović, prezentirala je studentima značaj integrirane zaštite naslijeđa “Budućnost za našu prošlost 1975–2015.“, dok je izvršni dužnosnik Komisije Mirzah Fočo prezentirao upotrebu drveta u historijskim strukturama vernakularne arhitekture. U okviru programa, Komisija je organizirala dolazak specijalnog gosta, arhitekta-konzervatora Aleksandra Ninkovića, kao i obilazak BDC-a Komisije.
 - **12. novembra 2015. godine – Potpisivanje sporazuma o donaciji kompjuterske opreme** u iznosu od 9.900 KM između Turske agencije za saradnju i koordinaciju (TIKA) u BiH i Komisije za očuvanje nacionalnih spomenika BiH. Predstavnicima medija su se obratili član Komisije za očuvanje nacionalnih spomenika, prof. dr. Dubravko Lovrenović i direktor TIKA-e za BiH Huseyin Şanlı koji su se osvrnuli na uspješnu saradnju Komisije i TIKA-e koja traje više od deset godina, ali i naglasili značaj buduće saradnje u cilju zaštite kulturno-historijskog naslijeđa u BiH.
- 4. Objavljivanje informacija na službenoj web-stranici Komisije (www.kons.gov.ba)**
- Web-stranica Komisije pruža informacije koje se odnose na:
- organizaciju i rad Komisije (zakonski okvir, interni akti Komisije, podaci o članovima Komisije i Sekretarijatu),

- informacije o nacionalnim spomenicima (odluke o proglašenju dobara nacionalnim spomenicima s obrazloženjem i fotografijama, lista peticija, podaci i fotografije o naslijeđu u opasnosti i radovima na zaštiti spomenika i dr.),
- aktivnosti Komisije (sjednice, posjete općinama, saradnja sa nadležnim organima i institucijama, saopćenja za javnost, aktuelnosti i dr.),
- servisne informacije (konkursi, tenderi i dr.).

Na web-stranicu se kontinuirano vrši unošenje podataka vezanih za rad Komisije. S obzirom na to da je trenutna web-stranica zastarjela što se tiče unosa podataka i održavanja različitih formi, te vizuelnog dojma, intenzivirane su aktivnosti na poboljšanju web-prezentacije, urađena je analiza trenutne stranice sa preporukama za poboljšanje te prijedlog rasporeda informacija.

Nova web-stranica Komisije

Tokom 2015. godine urađen je dizajn nove web-stranice Komisije, u skladu sa Uputstvom o izradi i održavanju službenih internetskih stranica institucija BiH. Postavljena je testna web-stranica *kons.evlada.ba* radi prebacivanja podataka sa stare stranice, te zaključen ugovor za prebacivanje postojećeg sadržaja na novu web-stranicu na web-platforni Vijeća ministara. Očekuje se da u prvom tromjesečju 2016. godine, nova stranica Komisije bude u punoj funkciji.

S obzirom na to da će nova web-stranica pružati daleko više mogućnosti nego trenutna (postavljanje fotografija, pdf-materijala i dr.), planirano je otvaranje naloga za youtube kanal, te otvaranje naloga na društvenim mrežama (facebook, instagram), a od izuzetne važnosti će biti priprema Strategije online komuniciranja. Svrha ovog dokumenta je da uspostavi ciljeve, smjernice i pravila za komunikaciju na internetskim kanalima koji će se koristiti u skladu s potrebama i raspoloživim resursima institucije.

Potreba za strateškim pristupom online komunikacijama proizlazi i iz činjenice da su one dio reforme javne uprave u BiH. Online komunikacija pripada 8. i 9. potpoglavlju (web-stranice i direktna komunikacija sa građanima) iz 5. poglavlja Revidiranog akcionog plana Strategije reforme javne uprave.

5. Provođenje informativno-edukativnih kampanja u cilju podizanja svijesti

Detaljnije pod tačkom 6.2. izvještaja.

6. Objavljivanje odluka

Detaljnije u prilogima 1, 6 i 7 izvještaja.

7. Priprema i diseminacija promotivnih materijala

Detaljnije pod tačkom 6.2. izvještaja

8. Promocija nacionalnih spomenika u tematskim magazinima (časopisima)

U saradnji sa redakcijom naučno-popularne revije o prirodi, čovjeku i ekologiji "FONDEKO-SVIJET" dogovoreno je da se za svaki broj pripremi skraćeni tekst iz odluke o dobrima koja obuhvataju i prirodno naslijeđe kao npr. kulturni krajolik i kulturni pejzaž, graditeljska cjelina sa prirodnim naslijeđem, prirodno i historijsko područje i dr. sa odgovarajućim fotografijama. Od 2012. godine dosada, objavljena su četiri izdanja, a peto izdanje je u pripremi. Nacionalni spomenici koji su promovirani u ovoj reviji su:

- 2012. godina, br. 35. – Prirodno-graditeljska cjelina – Korito Bregave sa mlinicama, stupama i mostovima, općina Stolac;
- 2013. godina, br. 36. – Kulturni pejzaž sa natpisom Mastana Bubanjića u Donjoj Drežnici, Grad Mostar;
- 2013.godina, br.37. – Prirodno i historijsko područje u selu Gorani, općina Konjic;
- 2014. godina, br. 38. – Kulturni pejzaž Hrustovačke spilje, općina Sanski Most.

Za 2015. godinu pripremljen je tekst sa fotografijama Prirodno-graditeljske cjeline – Kula Radetina sa prirodnim naslijeđem, općina Cazin.

Sve dosada objavljene revije "Fondeko-Svijet" mogu se pogledati i preuzeti sa web-stranice: <http://www.fondeko.ba/svijet.htm>. Štampana izdanja gore navedenih brojeva dostupna su i u BDC Komisije.

9. Praćenje i analiza medijskog izvještavanja (press clipping)

Analiza zastupljenosti rada Komisije u određenim pisanim i elektronskim medijima, pokazuje da od ukupno 2322 medijskih objava iz domena kulture općenito, rad Komisije obuhvata 234 objave, što je 10%. Drugi mediji koji nisu definirani ugovorom za praćenje, također izvještavaju o radu Komisije, što znači da rad Komisije obuhvata više medijskog prostora.

Prilog 14: Analiza press clippinga Komisije u 2015. godini

10. Postupanje po Zakonu o slobodi pristupa informacijama u Bosni i Hercegovini

Tokom 2015. godine zaprimljena su tri zahtjeva na osnovi Zakona o slobodi pristupa informacijama BiH, i svi zahtjevi su pozitivno riješeni u cjelosti te informacije dostavljene u zakonski predviđenom roku podnosiocima.

6.2. Podizanje svijesti o značaju naslijeđa

Kampanju "Moja Bosna i Hercegovina – moje naslijeđe" od 2006. godine implementira Komisija za očuvanje nacionalnih spomenika u saradnji s Ambasadom Sjedinjenih Američkih Država u BiH. Dosada je u kampanji učestvovalo preko 65 škola iz više od 20 bosanskohercegovačkih gradova (Sarajevo, Mostar, Trebinje, Livno, Jajce, Travnik, Stolac, Čapljina, Ljubinje, Šipovo, Ustikolina, Blagaj.....).

Svoj doprinos projektu dalo je oko 12.000 učenika, entitetska ministarstva za kulturu, prosvjetu i obrazovanje, federalni i kantonalni pedagoški zavodi, škole i druge ustanove zadužene za odgoj i obrazovanje. Kroz projektne aktivnosti, kao što su predavanja u školama i na lokalitetima nacionalnih spomenika, djeca stječu i usavršavaju znanja o kulturnome naslijeđu, sa fokusom na stare gradove, arhitekturu, umjetnička djela, zanate, usmena predanja i dr.

6.3. Biblioteka i dokumentacioni centar

Biblioteka i dokumentacioni centar Komisije (BDC) je zadužen za prikupljanje, obradu, čuvanje i davanje na korištenje dokumentacije o nacionalnim spomenicima BiH. Ova biblioteka saradnicima Komisije osigurava pristup fondovima bibliotečke i dokumentarne građe, informacijama i sadržajima za potrebe stručnog rada na proglašenju dobra nacionalnim spomenikom. Pored toga, Biblioteka svoj fond stavlja na raspolaganje studentima, magistrantima, doktorantima kao i istraživačima u oblasti naslijeđa.

Ustrojstvo centra bazirano je na dva usko povezana dijela bibliotečkom i dokumentacionom. Bibliotečki dio čini fond od 2.500 jedinica knjižne građe iz oblasti arhitekture, umjetnosti, historije, menadžmenta u naslijeđu, arheologije, etnologije i pravne zaštite. Fond neknjižne građe čine: projekti, kartografska građa, tehnička i fotodokumentacija i novinski članci. Fond neknjižne građe ima oko 30.000 bibliotečkih jedinica. Građa biblioteke podjeljena je u deset zbirki. Obrada građe vrši se po Međunarodnim standardima ISBD(M) za opis knjižne građe i ISBD(ER) za opis elektroničke građe.

Građa iz zbirki je evidentirana u inventarnim knjigama i digitalnim katalogima koji se dopunjavaju.

Prilog 16: *Izveštaj o radu biblioteke i dokumentacionog centra u 2015. godini*

6.4. Baza podataka o spomenicima

Baza – središnji inventar naslijeđa BiH je otvoren i kontinuiran sistem čija je osnovna namjena:

- objediniti pregled cjelokupnog fonda BiH – za sva dobra i spomenike objediniti sve relevantne podatke i omogućiti njihovu široku dostupnost i jednostavno pretraživanje (historijat, pregled trenutnog stanja, radova, stepen dokumentiranosti, bibliotečku i dokumentacijsku građu vezanu uz dobra itd.),
- osigurati baze znanja neophodne za rad na održavanju i zaštiti kulturno-historijskog naslijeđa BiH,
- kreirati podloge za izradu prostornih i urbanističkih planova na nivou države, entiteta, općina,
- olakšati naučna istraživanja kulturno-historijskog naslijeđa BiH.

Središnji inventar naslijeđa BiH se sastoji od dva modula, odnosno modula spomenici i modula dokumentacijsko-bibliotekarske zbirke (DBZ).

Modul spomenici sadrži osnovne informacije o svim dobrima i spomenicima – pravni status, zone i mjere zaštite, historijski podaci, vlasništvo, upotreba i sl. relevantne informacije u skladu sa preporukama Vijeća Evrope (Core Data Index – indeks osnovnih podataka) za historijske građevine i spomenike graditeljskog naslijeđa) i sistemu zaštite BiH.

Modul dokumentacijsko-bibliotekarske zbirke (DBZ) sadrži digitalizirane dokumentacijske zbirke (zbirka projekata, fototeka, fotoCDteka – digitalne fotografije, CDteka, planoteka, referentna planska dokumentacija, biblioteka, hemeroteka, topografska zbirka i ostalo) i predstavlja pomoć za inventariziranje i katalogiziranje dokumentacijskih zbirki s područja zaštite kulturnog naslijeđa.

U 2015. godini nastavljen je unos podataka u bazu te otklanjanje grešaka koje se javljaju u radu baze. U toku godine u bazu su uneseni podaci za 49 nacionalnih spomenika, te je vršeno ažuriranje podataka za prethodno unesene odluke. Ukupan broj unesenih odluka dosada je 326.

Realizirane aktivnosti u toku 2015. godine:

- 31.01.2015. godine je istekao tromjesečni ugovor o održavanju baze sa IN2 d.o.o. Sarajevo;
- 16.03.2015. godine je pokrenut postupak javne nabavke usluga održavanja prostorne baze podataka o spomenicima, a 07.04.2015. godine je sklopljen ugovor sa firmom ConnexIT d.o.o. Sarajevo;
- 06.05.2015. godine održan sastanak sa predstavnicima spomenute firme kada su dogovorene daljnje aktivnosti vezane za unos podataka u bazu.

7. ORGANIZACIJA KOMISIJE

7.1. Sastav Komisije

Na osnovi člana II stav 4 Aneksa 8. i člana 5. Odluke o Komisiji za očuvanje nacionalnih spomenika Predsjedništvo Bosne i Hercegovine na 119. sjednici, održanoj 21. decembra 2001. godine, i 126. sjednici, održanoj 21. februara 2002. godine, donijelo je Odluku o imenovanju članova Komisije prema kojoj Komisiju sačinjavaju tri domaća i dva inozemna člana: Amra Hadžimuhamedović (Sarajevo), Ljiljana Ševo (Banja Luka), Dubravko Lovrenović (Sarajevo), Zeynep Ahunbay (Turska) i Tina Wik (Švedska).

U skladu sa članom 5. stav 4 Odluke o Komisiji za očuvanje nacionalnih spomenika, članica Komisije Amra Hadžimuhamedović je zasnovala radni odnos u Komisiji. Predsjedništvo BiH donijelo je i odluke o produženju mandata za narednih pet godina: članovima Komisije iz Bosne i Hercegovine (27. marta 2007. godine), i Zeynep Ahunbay, međunarodnoj članici Komisije (5. decembra 2007. godine) čiji angažman finansira Vlada Republike Turske, kao i Odluku o imenovanju Martina Cherryja za drugog međunarodnog člana Komisije (26. juna 2008. godine), umjesto Tine Wik. Navedene odluke o imenovanju i reizboru članova Komisije objavljene su u "Službenom glasniku BiH", br. 43/07, 98/07 i 64/08).

Komisija se u augustu 2009. godine obratila Predsjedništvu BiH sa zahtjevom za razrješenje Zeynep Ahunbay, na njen zahtjev, a u januaru 2010. godine sa zahtjevom za razrješenje Martina Cherryja, zbog nemogućnosti da Vijeće Evrope dalje finansira njegovo učešće u radu Komisije, te za imenovanje nova dva međunarodna člana Komisije Friedricha Lütha i Nafia Gül Asatekina. Međutim, i pored više urgencija, Predsjedništvo nije razmatralo te zahtjeve. To je otežalo rad Komisije, pa je u periodu 2011–2015. godine održan manji broj sjednica od propisanog (6 godišnje), a rad Komisije uz pomoć elektronskih metoda komuniciranja je intenziviran, kako bi bilo osigurano pravovremeno obavljanje poslova iz nadležnosti Komisije.

Nakon imenovanja novog saziva Predsjedništva BiH, Komisija je dana 19.11.2014. godine uputila zahtjev za donošenje odluke o imenovanju članova Komisije za očuvanje nacionalnih spomenika za naredni petogodišnji mandat, ali i pored više urgencija Predsjedništvo nikada nije razmatralo taj zahtjev.

7.2. Sjednice Komisije

U 2015. godini održane su tri (3) sjednice Komisije, i to:

- 65 sjednica, od 3. do 5. marta 2015. godine (predsjedavajući Dubravko Lovrenović);
- 66. sjednica, od 4. do 6. novembra 2015. godine (predsjedavajuća Ljiljana Ševo);
- 67. sjednica, od 16. do 18. decembra 2015. godine (predsjedavajuća Ljiljana Ševo).

7.3. Sekretarijat Komisije

Stručne i administrativne poslove obavlja Sekretarijat Komisije, koji sačinjava stručno i kompetentno osoblje, i to za: arheološko naslijeđe, graditeljsko naslijeđe, cjeline graditeljskog naslijeđa i kulturne krajolike, pokretno naslijeđe, pravne poslove, međunarodno pravo, finansijske poslove i tehničku koordinaciju.

Izvršni funkcioner organizira i rukovodi radom Sekretarijata.

Prema Pravilniku o unutrašnjoj organizaciji Komisije, Sekretarijat sačinjava:

1. izvršni funkcioner,
2. pomoćnik izvršnog funkcionera za pravne poslove,
3. pomoćnik izvršnog funkcionera za naslijeđe,
4. saradnik za arheologiju (2 izvršioca),
5. saradnik za pokretno naslijeđe,
6. historičar umjetnosti,
7. saradnik za spomenike graditeljskog naslijeđa (3 izvršioca),
8. saradnik za cjeline graditeljskog naslijeđa i kulturne krajolike (3 izvršioca),
9. saradnik za provođenje Konvencije o zaštiti svjetske kulturne baštine,
10. saradnik za međunarodno pravo,
11. saradnik za odnose sa javnošću,
12. saradnik za budžet i javne nabavke,
13. saradnik za finansije,
14. saradnik za tehničku koordinaciju (šef kabineta),
15. dokumentarista,
16. tehnički sekretar,
17. domaćica,
18. vozač-kurir.

Izvršni funkcioner i službenici Komisije zasnivaju radni odnos u Komisiji, a članovi Komisije mogu zasnovati radni odnos (član 5. stav 4 Odluke Predsjedništva BiH o Komisiji za očuvanje nacionalnih spomenika).

Sva radna mjesta su popunjena, u skladu sa zakonom, i to:

- 1 imenovano lice (član Komisije, u tehničkom mandatu od 28.03.2012.);
- 1 rukovodeći državni službenik (izvršni funkcioner);
- 2 rukovodeća državna službenika;
- 16 državnih službenika;
- 4 zaposlenika.

Komisija je, na osnovi preporuka Ureda za reviziju finansijskog poslovanja, na svojoj 50. sjednici održanoj 11. marta 2011. godine donijela prijedlog novog Pravilnika o unutrašnjoj organizaciji, kojim je proširena postojeća sistematizacija, tako da je uvedeno 8 novih radnih mjesta, a ukupni broj izvršilaca se povećao sa 23 na 44. Prijedlog pravilnika dostavljen je na mišljenje Uredu za zakonodavstvo Vijeća ministara BiH, Ministarstvu pravde BiH i Ministarstvu finansija i trezora BiH, koji su dali pozitivno mišljenje. Pravilnik će stupiti na snagu nakon pribavljanja saglasnosti Predsjedništva Bosne i Hercegovine. Prijedlog novog Pravilnika dostavljen je dana 08.01.2015. godine Predsjedništvu Bosne i hercegovine.

7.4. Interni akti Komisije

- Odluka o izmjenama i dopunama Poslovnika o radu Komisije za očuvanje nacionalnih spomenika ("Službeni glasnik BiH", broj 89/15);
- Pravilnik o internim procedurama javnih nabavki roba usluga i radova, broj 03.1-2.14-47/15-1 od 04.02.2015.;
- Izveštaj o radu Komisije za očuvanje nacionalnih spomenika u 2014. godini, broj 09-2.14-47/15-2 od 03.03.2015.;
- Odluka o obrazovanju tima za realizaciju Projekta "Zgrada Historijskog muzeja BiH – rehabilitacija krova", broj 02-07.2-52/15-1 od 10.02.2015; 02-07.2-52/15-3 od 27.05.2015; 02-07.2-52/15-6 od 07.07.2015; 02-07.2-52/15-7 od 03.09.2015; 06.1-7.2-52/15-9 od 23.10.2015.;

- Odluka o razvrstavanju Komisije prema funkcionalnoj klasifikaciji Ministarstva finansija i trezora BiH (COFOG), broj 03.1-16.1-12/15-9 od 15.04.2015.;
- Odluka o sukobu interesa u postupku javnih nabavki, broj 03.1-16.4-68/15-4 od 20.04.2015.;
- Rješenje o imenovanju izvršnog funkcionera Komisije (“Službeni glasnik BiH”, broj 39/15);
- Rješenje o imenovanju pomoćnika izvršnog funkcionera za naslijeđe u Komisiji (“Službeni glasnik BiH”, broj 52/15);
- Rješenje o imenovanju Radne grupe za izradu srednjoročnog plana rada Komisije, za period 2016–2018. godine, broj 03.1-07.2-52/15-2 od 27.05.2015.;
- Odluka o obrazovanju tima za realizaciju Projekta “Konzervatorski i restauratorski radovi u enterijeru Mišćine džamije u Sarajevu”, broj 06.3-07.2-52/15-5 od 17.06.2015.;
- Okvirni plan rada i poslovanja Komisije za 2016. godinu, broj 03.2-7.4-62/15-4 19.08.2015.;
- Odluka o obrazovanju tima za realizaciju Projekta pod nazivom “Historijska zgrada Društva Crvenog krsta / križa BiH u Sarajevu” – Adaptacija enterijera u nivou 1. sprata – Faza III, broj 07.3-07.2-52/15-8 od 13.10.2015.;
- Rješenje o izmjeni Rješenja o ovlaštenju za upotrebu i čuvanje pečata, broj 03.1-07.1-144/15-1 od 16.11.2015.;
- Odluka o imenovanju komisija za provođenje godišnjeg popisa stalnih sredstava, obaveza i potraživanja u Komisiji za očuvanje nacionalnih spomenika za 2015. godinu, broj 03.1-16.7-143/15-2 od 03.12.2015.;
- Odluka o dopuni Odluke o pravu zaposlenog člana Komisije na refundiranje troškova za korištenje taxi-usluga za potrebe prevoza na posao i sa posla, broj 03.1-7.2-1/15-91 od 29.12.2015.;
- Rješenje o određivanju funkcija i radnih mjesta kojima se pošta dostavlja u rad, broj 03.1-07.2-1/15-92 od 31.12.2015.;
- Odluka o davanju ovlaštenja za praćenje realizacije ugovora sa vanjskim saradnicima, broj 03.1-07.2-1/15-89 od 25.12.2015.

7.5. Vanjski saradnici

U skladu sa članom 10. Pravilnika o unutrašnjoj organizaciji, za obavljanje privremenih i povremenih poslova za potrebe Komisije, kao i potrebe realizacije projekata, izvršni funkcioner angažira stručnjake raznih profila na osnovi ugovora o djelu, autorskog ugovora ili ugovora o privremenim i povremenim poslovima.

U cilju transparentnog i konkurentnog angažiranja, izbor vanjskih saradnika vrši se na osnovi Javnog poziva objavljenog na zvaničnoj web-stranici Komisije, i to za poslove:

- koordinatora i asistenata koordinatora na realizaciji projekata koje implementira Komisija iz donatorskih sredstava;
- čitanje i prevod djela epigrafike i orijentalistike pisanih arapskim pismom (bosančica, osmansko pismo);
- administriranje i ažuriranje službene web-stranice Komisije;
- snimanje nacionalnih spomenika i izrada tehničke dokumentacije;
- pomoćni poslovi u arhivi, biblioteci i dokumentacionom centru Komisije;

- vozača;
- održavanje i čišćenje prostorija i opreme.

7.6. Stručna obuka saradnika

Saradnici zaposleni u Komisiji uključeni su u program obuke državnih službenika koju organizira Agencija za državnu službu Bosne i Hercegovine u sklopu Projekta izgradnje kapaciteta državnih službenika na nivou BiH. Saradnici Komisije su tokom 2015. godine bili uključeni i u druge oblike stručnog usavršavanja.

Prilog 17: *Stručno obrazovanje i usavršavanje zaposlenih u 2015. godini*

7.7. Smještaj Komisije

Od septembra 2015. godine sjedište Komisije je u Sarajevu, Maršala Tita 9a, u Zgradi zajedničkih institucija Bosne i Hercegovine.

8. PROCJENA IZVRŠENJA BUDŽETA KOMISIJE

Prema Zakonu o budžetu institucija Bosne i Hercegovine i međunarodnih obaveza za 2015. godinu, Komisiji je odobren Budžet u ukupnom iznosu od 1.228.000 KM (tekući izdaci 1.178.000 KM i kapitalni izdaci 50.000 KM).

Struktura odobrenog i procjena izvršenja budžeta Komisije za period od 12 mjeseci 2015. godine prikazana je u Tabeli br. 1.

Tabela br. 1.

Redni broj	Izdaci i vrsta rashoda	Ekonomski kod	Odobreni budžet za 2015.godinu	Realizirano u tekućem periodu	Index 5/4
1	2	3	4	5	6
I	TEKUĆI IZDACI		1.178.000		
1.	Plaće zaposlenih	611000	709.000	681.204	96%
2.	Naknade troškova zaposlenih i skupštinskih zastupnika	611200	76.000	53.864	71%
3.	Putni troškovi	613100	40.000	31.322	78%
4.	Izdaci telefonskih i poštanskih usluga	613200	18.000	17.964	99%
5.	Izdaci za energiju i komunalne usluge	613300	27.000	16.539	61%
6.	Nabavka materijala	613400	15.000	5.014	33%
7.	Usluge prevoza i goriva	613500	18.000	10.298	57%
8.	Unajmljivanje imovine i opreme	613600	44.000	72.050	163%
9.	Izdaci za tekuće održavanje	613700	13.000	6.481	50%
10.	Izdaci za osiguranje, bankarske usluge i platni promet	613800	3.000	555	18,5%
4	Ugovorene i druge posebne usluge	613900	215.000	200.000	89%
II	KAPITALNI IZDACI		45.000 + 5.000 (prihod)	45.0000	100%
1.	Nabavka opreme	821300			
	SVEUKUPNO (TEKUĆI IZDACI, KAPITALNI IZDACI)		1.228.000	1.140.291	93%

Obrazloženje Tabele br. 1

Procjenjeno izvršenje u periodu od 01.01. do 31.12 2015. godine iznosi 1.140.050 KM, što je 93 % odobrenog budžeta. Može se zaključiti da je realizacija budžeta usklađena sa planiranim aktivnostima Komisije.

Na ekonomskim kategorijama: nabavka materijala (613400); usluge prevoza i goriva (613500); izdaci tekućeg održavanja (613700); i izdaci za osiguranje, bankarske usluge i platni promet (613900) evidentno je odstupanje od planiranog (niži nivo realizacije).

613400 – Nabavka materijala planirane godišnje nabavke: kancelarijski i kompjuterski potrošni materijal, stručne knjige i literatura, higijenski materijal i ostali potrošni materijal.

Provedbom postupka javnih nabavki u skladu sa Zakonom o javnim nabavkama i korištenjem kriterija najniže cijene za izbor dobavljača zaključeni su ugovori manje vrijednosti od planiranih, te shodno tome nastaju odstupanja.

Planirana nabavka higijenskog materijala u iznosu od 3.000 KM za 2015. godinu nije provedena iz razloga preseljenja Komisije u prostorije Institucija BiH. Higijenski materijal je obezbijedila Služba za zajedničke poslove.

613500 – Usluge prevoza i goriva

Prodajom vozila sredinom godine, smanjena je potreba za planiranim količinama goriva za jedno vozilo, što je utjecalo na izvršenje ove stavke.

613700 – Izdaci za tekuće održavanje

Planirane su godišnje nabavke na iskustvenom budžetu iz ranijih godina, što uključuje:

- materijal za opravku i održavanje opreme;
- materijal za opravku i održavanje vozila (2 vozila);
- usluge opravki i održavanja opreme;
- usluge opravki i održavanja vozila;
- usluge pranja vozila;
- ostale usluge.

Prodaja dotrajalog službenog vozila znatno je smanjila nivo realizacije na stavkama materijal i usluge za održavanje vozila.

Odstupanje od planiranog evidentno je i na ekonomskoj kategoriji – Unajmljivanje imovine i opreme (613600). Budžet iz Ministarstva finansija i trezora na ovoj kategoriji odobren je za 5 mjeseci. S obzirom na to da se dinamika preseljenja nije odvijala po planu, odobreni bužet nije bio dovoljan za plaćanje obaveza po osnovi ugovora o zakupnini (Dom sindikata). Za nedostatna sredstva u iznosu od 28.050 KM Komisija se obratila zahtjevom Ministarstvu finansija i trezora. Izvršenje ove stavke 164%.

613800 – Izdaci za osiguranje, bankarske usluge i platni promet

Planirana nabavka registracije vozila za 2015. godinu, realizirala se u januaru 2016. godine, jer je dobavljač vozilo isporučio 31.12.2015. godine.

Na ostalim ekonomskim kategorijama nema značajnih odstupanja.

Godišnji izvještaj o izvršenju budžeta za razdoblje od 01.01. do 31.12.2015. godine dostavlja se Ministarstvu finansija i trezora do 02.03.2015. godine.

Komisija je obavezna 10 dana nakon usvajanja godišnji izvještaj objaviti na svojoj web-stranici.

9. ZAKLJUČCI

Da bi ispunila ciljeve svog utemeljenja Aneksom 8., ispunila ovlaštenja i preuzete obaveze u vezi sa međunarodnom saradnjom i zastupanjem interesa Bosne i Hercegovine, neophodno je:

- da Predsjedništvo BiH, u skladu sa svojim nadležnostima utvrđenim Aneksom 8. Općeg okvirnog sporazuma za mir u BiH, imenuje nove članove ili produži mandat aktuelnim članovima Komisije;
- da Predsjedništvo BiH i Vijeće ministara BiH usvoji novi Pravilnik o unutrašnjoj organizaciji, a kako bi se kadrovskim popunjavanjem ispunile preporuke Ureda za reviziju finansijskog poslovanja institucija BiH za usklađivanjem aktivnosti Komisije na donošenju odluka o proglašenju nacionalnih spomenika i na projektima međunarodne saradnje sa ljudskim resursima Komisije i zakonskom regulativom.

Izveštaj i priprema:

Mirzah Fočo
izvršni funkcioner

Branka Mekić, pomoćnica izvršnog
funkcionera za pravne poslove

Mirela Mulalić-Handan, pomoćnica izvršnog
funkcionera za naslijeđe

Damir Bačvić, stručni saradnik
za tehničku koordinaciju

Predsjedavajuća Komisije

Ljiljana Ševo

Broj: 09-2.14-21/16-3
Sarajevo, 01.02.2016. godine